

四庫全書

集部

欽定四庫全書

柳河東集注卷三十四

宋 董宗說 張敦頤 潘緯 音釋

書

與太學諸生喜詣闕留陽城司業書

貞元十四年九月

二十六日集賢殿正字柳宗元敬致尺牘太學諸生足下始朝廷用諫議大夫陽公為司業諸生陶煦醇懿熙然大洽于茲四祀而已詔書出為道州僕時通籍光範

門

按漢書志通籍者為二尺竹牒記其年紀  
名字物色懸之宮門按省相應乃得入

就職書府

聞之悒然不喜

悒乙反切  
不樂也

非特為諸生戚戚也乃僕亦

失其師表而莫有所矜式焉既而署吏有傳致詔草者

僕得觀之蓋主上知陽公甚熟嘉美顯寵勤至備厚乃

知欲煩陽公宣風喬土覃布美化于黎獻也遂寬然少

喜如獲慰薦于天子休命然而退自感悼幸生明聖不

諱之代不能布露所蓄論列大體聞于下執事冀少見

採取而還陽公之南也翌日退自書府就車于司馬門

外聞之於抱關掌管者道諸生愛慕陽公之德教不忍

其去頓首西闕下懇悃至願乞留如故者百數十人輒

用撫手喜甚震抃不寧不意古道復形于今僕嘗讀李

元禮嵇叔夜傳

李膺嵇康

觀其言太學生徒仰闕赴訴者僕

謂訖千百年不可覩聞乃今日聞而覩之誠諸生見賜

甚盛於戲

音烏希潘云與鳴呼同義

始僕少時嘗有意遊太學受師

說以植志持身焉當時說者咸曰太學生聚為朋曹侮

老慢賢有墮窳敗業而利口食者

墮徒果切窳以主切

有崇飾惡

言而肆鬪訟者有凌傲長上而詆罵有司者

詆蘇內息  
醉二切罵

也其退然自克特殊於衆人者無幾耳僕聞之恟駭怛

悸

恟虛勇虛容二切怛  
當割切悸其季切

良痛其遊聖人之門而衆為是

啗啗也

潘云啗徒合切詩噂沓背憎釋文沓作  
啗注噂噂啗啗相對談語背則相憎

遂退託

鄉閭家塾考厲志業過太學之門而不敢跼顧

跼音  
尚

何能仰視其學徒者哉今乃奮志厲義出乎千百年之

表何聞見之乖刺歟

刺盧達  
切戾也

豈說者過也將亦時異人

異無嚮時之桀害者耶其無乃陽公之漸漬導訓明效

所致乎夫如是服聖人遺教居天子太學可無愧矣於

戲陽公有博厚恢弘之德能容善偽

一本能字下有并字

來者不

拒曩聞有狂惑小生依託門下

貞元十四年太學生薛約言事得罪謫連州陽

城送之郊外帝惡城黨有罪出為道州刺史

或乃飛文陳愚醜行無賴而論

者以為言謂陽公過於納汙無人師之道是大不然仲

尼吾黨狂狷南郭獻譏

荀子法行篇南郭惠子問於子貢曰夫子之門何其雜也

曾

參徒七十二人致禍負芻孟軻館齋從者竊屨

並出孟子

彼

一聖兩賢人繼為大儒然猶不免如之何其拒人也俞

扁之門不拒病夫

扁 婢 典 切 俞 跗 扁 鵲 古 之 良 醫

繩墨之側不拒枉材

師儒之席不拒曲士理固然也且陽公之在于朝四方

聞風仰而尊之貪冒苟進邪薄之夫庶得少沮其志不

遂其惡雖微師尹之位而人實具瞻焉與其宣風一方

覃化一州其功之遠近又可量哉諸生之言非獨為已

也於國體實甚宜願諸生勿得私之想復再上故少佐

筆端耳勗此良志俾為史者有以紀述也努力多賀

奴 努

古切 勉也

柳宗元白

答韋中立論師道書

二十一日宗元白辱書云欲相師僕道不篤業甚淺近  
環顧其中未見可師者雖嘗好言論為文章甚不自是  
也不意吾子自京師來蠻夷間乃幸見取僕自卜固無  
取假令有取亦不敢為人師為衆人師且不敢況敢為  
吾子師乎孟子稱人之患在好為人師由魏晉氏以下  
人益不事師今之世不聞有師有輒譁笑之以為狂人  
獨韓愈奮不顧流俗犯笑侮收召後學作師說因抗顏



而為師世果羣怪聚罵指目牽引而增與為言詞

一本作辭

字同愈以是得狂名居長安炊不暇熟又挈浙而東如是

者數矣

數色角切類也

屈子賦曰邑犬羣吠吠所怪也

屈原楚詞懷沙

篇云屈其勿切

僕往聞庸蜀之南恒雨少日日出則犬吠予以

為過言前六七年僕來南二年冬幸大雪踰嶺被南越

中數州數州之犬皆蒼黃吠噬狂走者累日至無雪乃

已然後始信前所聞者今韓愈既自以為蜀之日而吾

子又欲使吾為越之雪不以病乎非獨見病亦以病吾

子然雪與日豈有過哉顧吠者犬耳度今天下不吠者  
幾人而誰敢銜怪於羣目以召閹取怒乎僕自謫過以  
來益少志慮居南中九年增脚氣病漸不喜閹豈可使

呶呶者

呶尼  
交切

早暮拂吾耳騷吾心則固僵仆煩憤

僵音  
姜仆

富赴勑三音  
情古對切

愈不可過矣平居望外遭齒舌不少獨欠

為人師耳抑又聞之古者重冠禮將以責成人之道是  
聖人所尤用心者也數百年來人不復行近有孫昌胤  
者獨發憤行之既成禮明日造朝至外廷薦笏言於卿

士曰某子冠畢應之者咸慙然

慙音武  
改容也

京兆尹鄭叔則

怫然

怫符  
弗切

曳笏却立曰何預我耶廷中皆大笑天下不

以非鄭尹而快孫子何哉獨為所不為也今之命師者

大類此吾子行厚而辭深凡所作皆恢恢然有古人形

貌雖僕敢為師亦何所增加也假而以僕年先吾子聞

道著書之日不後誠欲往來言所聞則僕固願悉陳中

所得者吾子苟自擇之取某事去某事則可矣若定是

非以教吾子僕材不足而又畏前所陳者其為不敢也

決矣吾子前所欲見吾文既悉以陳之非以耀明于子  
聊欲以觀子氣色誠好惡何如也今書來言者皆大過  
吾子誠非佞譽誣諛之徒直見愛甚故然耳始吾幼且  
少為文章以辭為工及長乃知文者以明道是固不苟  
為炳炳烺烺

一作烺烺云烺音  
朗烺烺大明貌

務采色夸聲音而以為

能也凡吾所陳皆自謂近道而不知道之果近乎遠乎  
吾子好道而可吾文或者其於道不遠矣故吾每為文  
章未嘗敢以輕心掉之

悼徒  
弔切

懼其剽而不留也

剽匹  
妙切

未

嘗敢以怠心易之懼其弛而不嚴也未嘗敢以昏氣出之懼其昧沒而雜也未嘗敢以矜氣作之懼其偃蹇而驕也抑之欲其與揚之欲其明疎之欲其通廉之欲其節激而發之欲其清固而存之欲其重此吾所以羽翼夫道也本之書以求其質本之詩以求其恒本之禮以求其宜本之春秋以求其斷本之易以求其動此吾所以取道之原也叅之穀梁氏以厲其氣叅之孟荀以暢其支叅之莊老以肆其端叅之國語以博其趣叅之離

騷以致其幽叅之太史以著其潔此吾所以旁推交通  
而以為之文也凡若此者果是耶非耶有取乎抑其無  
取乎吾子幸觀焉擇焉有餘以告焉苟亟來以廣是道  
子不有得焉則我得矣又何以師云爾哉取其實而去  
其名無招越蜀吠怪而為外廷所笑則幸矣宗元復白

一本無

復字

答貢士元公瑾論仕進書

二十八日宗元白前時所枉文章諷讀累日辱致來簡

受賜無量然竊觀足下所以殷勤其文旨者豈非深寡

和之憤

和胡卧切宋玉云其曲彌高其和彌寡

積無徒之歎懷不能已赴

訴於僕乎如僕尚何為者哉且士之求售於有司或以

文進或以行達者稱之不患無成足下之文左馮翊崔

公先唱之矣秉筆之徒由是增敬足下之行汝南周顒

客又先唱之矣逢掖之列亦以加慕

逢潘本作縫音逢以緘綴衣也掖音

亦與服同禮記衣逢掖之衣逢猶大也大袂禪衣也

夫如是致隆隆之譽不久矣

又何戚焉古之道上延乎下下倍乎上上下下洽通而薦

能之功行焉故天子得宜為天子者薦之於天諸侯得  
宜為諸侯者薦之於王大夫得宜為大夫者薦之於君  
士得宜為士者薦之於有司薦於天堯舜是也薦於王  
周公之徒是也薦於君鮑叔牙子罕子皮是也薦於有  
司而專其美者則僕未之聞也是誠難矣古猶難之而  
況今乎獨不得與足下偕生中古之間進相援也退相  
拯也已乃出乎今世雖王林國韓長孺復生

說苑衛靈公  
有士曰

王林國有賢人必進而任之無不達也不能達退而與  
分其祿前漢韓安國字長孺所推舉皆廉士賢於已者



不能為足下抗手而進以取僂笑矧僕之齷齪者哉

潘云

齷乙角切齷測角切小節也史記作握齷注急促之貌前漢作握齷注局隄也

若將致僕於奔

走先後之地而役使之

先蘇薦切後胡豆切

則勉充雅素不敢告

憊

蒲拜切

嗚呼始僕之志學也甚自尊大頗慕古之大有

為者汨沒至今自視缺然知其不盈素望久矣上之不

能交誠明達德行延孔子之光燭于後來次之未能勵

材能興功力致大康于民垂不滅之聲退乃俛俛於下

列

俛音振又丑良切無見貌

咕咕於末位

咕他協日涉二切

偃仰驕矜道人

短長不亦冒先聖之誅乎固吾不得已耳樹勢使然也

穀梁子曰心志既通而名譽不聞友之過也

出穀梁傳  
昭公九年

蓋舉知揚善聖人不非況足下有文行唱之者有其人  
矣繼其聲者吾敢闕焉其餘去就之說則足下觀時而  
已不悉宗元白

答嚴厚輿論師道書

二十五日某白馮翊嚴生足下得生書言為師之說怪  
僕所作師友箴與答韋中立書欲變僕不為師之志而

欽定四庫全書

初河東集注  
卷三十四

九

屈已為弟子凡僕所為二文其卒果不異僕之所避者  
名也所憂者其實也實不可一日忘僕聊歌以為箴行  
且求中以益已慄慄不敢暇又不敢自謂有可師乎人  
者耳若乃名者方為薄世笑罵僕脆怯尤不足當也內  
不足為外不足當衆口雖懇懇見迫其若吾子何實之  
要二文中皆是也吾子其詳讀之僕見解不出此吾子  
所云仲尼之說豈易耶仲尼可學不可為也學之至斯  
則仲尼矣未至而欲行仲尼之事若宋襄公好霸而敗

國卒中矢而死

事出左傳僖公二十三年

仲尼豈易言耶馬融鄭玄

者二子獨章句師耳今世固不少章句師僕幸非其人

吾子欲之其有樂而望吾子者矣言道講古窮文辭以

為師則固吾屬事僕才能勇敢不如韓退之故又不為

人師人之所見有同異吾子無以韓責我若曰僕拒千

百人又非也僕之所拒拒為師弟子名而不取當其禮

者也若言道講古窮文辭有來問我者吾豈嘗瞋目閉

口邪

瞋稱人切怒目也

敬叔吾所信愛

呂恭字敬叔

今不得見其人

又不敢廢其言

一本無不字却言字下有哉字

吾子文甚暢遠恢恢乎

其開大路將疾馳也攻其車肥其馬長其策

即策字

調其

六轡中道之行大都捨是又奚師歟亟謀於知道者而

考諸古師不乏矣幸而亟來

亟去吏切

終日與吾子言不敢

倦不敢愛不敢肆苟去其名全其實以其餘易其不足

亦可交以為師矣如此無世俗累而有益乎已古今未

有好道而避是者宗元白

報袁君陳秀才避師名書

秀才足下僕避師名久矣往在京師後學之士到僕門

日或數十人僕不敢虛其來意有長必出之有不至必

甚之

甚渠記切教也

其教也雖若是當時無師弟子之說其所

不樂為者非以師為非弟子為罪也有兩事故不能自

視以為不足為一也世久無師弟子決為之且見非且

見罪懼而不為二也其大說具答韋中立書今以往可

觀之秀才貌甚堅辭甚強僕自始覲固奇秀才及見兩

文愈益奇雖在京都日數十人到門者誰出秀才右耶

前已異秀才可為成人僕之心固虛矣又何鯢鵬互鄉

於尺牘哉

一本何下更有辱字

秋風益高暑氣益衰可偶居卒談

秀才時見咨僕有諸內者不敢愛惜大都文以行為本

在先誠其中其外者當先讀六經次論語孟軻書皆經

言左氏國語莊周屈原之辭稍采取之穀梁子太史公

甚峻潔可以出入餘書俟文成異日討也其歸在不出

孔子此其古人賢士所懔懔者求孔子之道不於異書

秀才志於道慎勿怪勿雜勿務速顯道苟成則勃然爾

勃潘本作穀口角切  
與慙同一本作慙字

久則蔚然爾

蔚音尉又紆勿切

源而流者

歲旱不涸蓄穀者不病凶年蓄珠玉者不虞殍死矣然則成而久者其術可見雖孔子在為秀才計未必過此不具宗元白

答韋珩示韓愈相推以文墨事書

珩音行

足下所封示退之書云欲推避僕以文墨事且以勵足下若退之之才過僕數人尚不宜推避於僕非其實可知一本無知可字固相假借為之詞耳退之所敬者司馬遷楊



雄遷於退之固相上下若雄者如太玄法言及四愁賦

揚雄以為詞莫麗於相如作四賦謂甘泉河東羽獵長楊賦後人妄加愁字也退之獨未作耳

決作之加恢奇至他文過揚雄遠甚雄文遺言措意

一文

本作頗短局滯澁不若退之猖狂恣睢肆意有所作

睢

一本作肆寓潘云恣七音切又若然者使雄來尚不宜

如字睢許維許鼻二切自得貌

推避而況僕耶彼好獎人善以為不屈已善不可獎故

慊慊云爾也

一本無也字

足下幸勿信之且足下志氣高好

讀南北史書通國朝事穿穴古今後來無能和

胡卧切一本作

如字

而僕稚駉卒無所為但赳赳文墨筆硯淺事

赳千皆切赳千

余切

今退之不以吾子勵僕而反以僕勵吾子愈非所宜

然卒篇欲足下自挫抑合當世事宜固當雖僕亦知無  
出此吾子年甚少知己者如麻不患不顯患道不立耳  
此僕以自勵亦以佐退之勵足下不宣宗元頓首再拜

### 答貢士廖有方論文書

三日宗元白得秀才書知欲僕為序然吾為文非苟然  
易也於秀才則吾不敢愛吾在京都時好以文寵後輩

由吾丈知名者亦為不少焉自遭斥逐禁錮益為輕薄  
小兒譁囂羣朋增飾無狀當途人率謂僕垢污重厚舉  
將去而遠之今不自料而序秀才秀才無乃未得嚮時  
之益而受後事之累去聲吾是以懼潔然盛服而與負塗

者處而又何賴焉然觀秀才勤懇意甚久遠不為頃刻  
私利欲以就文雅則吾曷敢以讓當為秀才言之然而  
無顯出於今之世視不為流俗所扇動者乃以示之既  
無以累秀才亦不增僕之詬罵也計無宜於此若果能

是則吾之荒言出矣宗元白

答貢士蕭纂求為師書

求為一本  
作欲相字

十二日宗元白始者負戴經籍退跡草廬塊守蒙陋坐  
自擁塞不意足下曲見記憶遠辱書訊貺以高文開其  
知思並去聲而又超僕以宗師之位貸僕以丘山之號流

汗伏地不知逃匿幸過厚也前時獲足下灌鍾城銘竊  
用唱導於聞人僕常赧然羞其僭踰今覽足下尺牘殷  
勤備厚似欲僕贊譽者此固所願也詳視所貺曠然以

喜是何旨趣之博大詞采之蔚然乎鼓行於秀造之列  
此其戈矛矣舉以見投為賜甚大俯用忖度不自謂宜  
顧視何德而克堪哉且又教以耘其蕪穢甚非所宜僕  
不敢聞也其他唯命宗元白

報崔黯秀才書

黯潘本作翦

崔生足下辱書及文章辭意良高所嚮慕不凡近誠有  
意乎聖人之言然聖人之言期以明道學者務求諸道  
而遺其辭辭之傳於世者必由於書道假辭而明辭假

書而傳要之之道而已耳道之及及乎物而已耳斯取  
道之內者也今世因貴辭而矜書粉澤以為工適密以  
為能不亦外乎吾子之所言道匪辭而書其所望於僕  
亦匪辭而書是不亦去及物之道愈以遠乎僕嘗學聖  
人之道身雖窮志求之不已庶幾可以語於古恨與吾  
子不同州部閉口無所發明觀吾子文章自秀士可通  
聖人之說今吾子求於道也外而望於予也愈外是其  
可惜歟吾且不言是負吾子數千里不棄朽廢者之意

故復云爾也凡人好辭工書者皆病癖也

癖音辟  
腹病也

吾不

幸蚤得二病學道以來日思砭鍼攻熨

砭悲廉彼驗二  
切以石刺病也

鍼諸深切與針同  
熨好勿切火熨也

卒不能去纏結心腑牢甚願斯須忘

之而不克竊嘗自毒今吾子乃始欽欽思易吾病不亦

惑乎斯固有潛塊積瘕中子之內藏

瘕音遐女病也玉  
篇又攻遐攻許二

切久病也腹中病也  
中丁仲切藏才浪切

恬而不悟可憐哉其卒與我何異

均之二病書字益下而子之意又益下則子之病又益

篤甚矣子癖於伎也吾嘗見病心腹人有思啗土炭

啗徒

臨切與  
啾同

嗜酸鹹者不得則大戚其親愛之者不忍其戚  
因探而與之觀吾子之意亦已戚矣吾雖未得親愛吾  
子然亦重來意之勤有不忍矣誠欲分吾土炭酸鹹吾  
不敢愛但遠言其證不可也俟面乃悉陳吾狀未相見  
且試求良醫為方已之苟能已大善則及物之道專而  
易通若積結既定醫無所能已幸期相見時吾決分子  
其啾嗜者不具宗元白

答吳秀才謝示新文書



某白向得秀才書及文章類前時所辱遠甚多賀多賀

秀才志為文章又在族父處

族父想謂吳武陵或曰子厚自謂其族父柳公綽耳

蚤夜孜孜何畏不日日新又日新也雖間不奉對苟文

益日新則若亟見矣夫觀文章宜若懸衡然增之銖兩

則俯反是則仰無可私者秀才誠欲令吾俯乎則莫若

增重其文今觀秀才所增益者不啻銖兩吾固伏膺而

俯矣愈重則吾俯茲甚秀才其懋焉苟增而不已則吾

首懼至地耳又何間踈之患乎還答不悉宗元白

復杜溫夫書

二十五日宗元白兩月來三辱生書書皆逾千言意者相望僕以不對答引譽者然僕誠過也而生與吾文又十卷噫亦多矣文多而書煩吾不對答而引譽宜可自反而來徵不肯相見

一本肯作曰

亟拜亟問其得終無辭乎

凡生十卷之文吾已略觀之矣吾性騷滯多所未甚諭

安敢懸斷是且非耶書拉吾必曰周孔

拉與抵同一本下疊周孔字

安可當也語人必於其倫生以直躬見拉宜無所諛道

一本無  
道字

而不幸乃曰周孔吾豈得無駭怪且疑生悖亂

浮誕無所取幅尺以故愈不對答來柳州見一刺史即

周孔之今而去我道連而謁於潮之二邦又得二周孔

去之京師京師顯人為文詞立聲名以千數又宜得周

孔千百何吾生胸中擾擾焉多周孔哉吾雖少為文不

能自雕斲引筆行墨快意累累

偷追切

意盡便止亦何所

師法立言狀物未嘗求過人亦不能明辨生之才致但

見生用助字不當律令唯以此奉答所謂乎歟耶哉夫

者疑辭也矣耳焉也者決辭也今生則一之宜考前聞人所使用與吾言類且異慎思之則一益也庚桑子言

藿蠋鵠卵者吾取焉

潘云蠋音蜀豆藿中大青蟲也鵠胡沃切莊子曰奔蜂不能化藿蠋

越難不能伏鵠卵

道連而謁於潮其卒可化乎然世之求知音

者一遇其人或為十數文即務往京師急日月犯風雨

走謁門戶以冀苟得今生年非甚少而自荆來柳自柳

將道連而謁於潮途遠而深矣則其志果有異乎又狀

貌嶷然類丈夫

嶷魚力切

視端形直心無岐徑其氣質誠可

也獨要謹充之爾謹充之則非吾獨能生勿怨

一本生字下有

宜字亟之二邦以取法時思吾言非固拒生者孟子曰余

不屑之教誨也者是亦教誨而已矣宗元白

上門下李夷簡相公書

日月使持節柳州諸軍事守柳州刺史柳宗元謹獻書

于相公閣下

謹字下一本有再拜字

宗元聞有行三塗之艱而墜

千仞之下者

左傳昭公四年注三塗在河南陸渾縣南

仰望於道號以求出

過之者日千百人皆去而不顧就令哀而顧之者不過

攀木俯首深矐太息

矐頻貢  
二音

良久而去耳其卒無可奈

何然其人猶望而不止也俄而有若烏獲者持長綆千

尋

綆古杏切  
汲井繩也

徐而過焉其力足為也其器足施也號之

而不顧顧而曰不能力則其人知必死於大壑矣何也

是時不可遇而幸遇焉而又不逮乎已然後知命之窮

勢之極其卒呼憤自斃

音弊

不復望於上矣宗元曩者齒

少心銳徑行高步不知道之艱以陷乎大厄窮躋殞墜

廢為孤囚日號而望者十四年矣其不顧而去與顧而

深曠者俱不乏焉然猶仰首伸吭張目而視

吭抗剛二音咽也

曰庶幾乎其有異俗之心非常之力當路而垂仁者耶

今閣下以仁義正直入居相位宗元實竊拊心自慶以

為獲其所望故敢致其詞以聲其哀若又捨而不顧則

知以躓踣斃無復振矣

踣滿墨切

伏惟動心焉宗元得罪之

由致謗之自以閣下之明其知之久矣繁言蔓詞祇益  
為黷伏惟念墜者之至窮錫烏獲之餘力舒千尋之綆  
垂千仞之艱致其不可遇之遇以卒成其幸庶號而望

者得畢其誠無使呼憤自斃沒有餘恨則士之死於門  
下者宜無先焉生之通塞決在此舉無任戰汗隕越之  
至不宣宗元惶恐再拜





柳河東集注卷三十四

# 欽定四庫全書

集部

柳河東集注卷三十五至

詳校官內閣學士

臣瑞保

檢討臣何思鈞覆勘

總校官進士

臣朱鈐

校對官編修

臣馮敏昌

謄錄監生

臣方祖益

欽定四庫全書

柳河東集注卷三十五

宋 童宗說 張敦頤 潘緯 音釋

啟

上廣州趙宗儒尚書啟

一本啟上更有陳情字

某啟 某夭罰深重餘息苟存

元和元年子厚母盧氏卒于永州

沉竄族

罪朝不圖夕伏謁無路不任荒戀之誠伏念宗元初授

御史之日尚書與杜司空

杜黃裳

先賜臨顧光耀里閭下

情至今尚增惶惕頃以黨與進退投竄零陵囚繫所迫

不得歸奉松檟哀荒窮毒人理所極親故遺忘

音

況於

他人朝夕之急饘粥難繼

饘諸延切  
亦作饘

宗祀所重不敢死

亡偷視累息已逾數月伏以尚書德量弘納義風遠揚

收撫之恩始於枯朽敢以餘喘上累深仁伏惟惻然見

哀使得存濟悽悽荒懇

悽音妻恭謹  
貌一曰勤也

叩顙南望竊以動

心於無情之地施惠於不報之人古烈尚難況在今日

而率然干冒決不自疑者蓋以聞義之日久嚮德之誠

至振高義於流俗之外合大度於古人之中獨有望於

閣下而已非敢以尋常祈向之禮當大賢匍匐之仁

音匍

扶又音蒲匍音伏又蒲墨切  
詩云凡民有喪匍匐救之夙夜忖度果於自卜方在

困辱不敢多言伏紙惶恐不勝戰越謹啟

上西川武元衡相公謝撫問啟

某啟某愚陋狂簡不知周防失於夷途陷在大罪伏匿  
嶺下于今七年追念徃愆寒心飛魄幸蒙在宥得自循  
省豈敢徹聞於廟廊之上見志於樽俎之際以求心於

萬一者哉相公以含弘光大之德廣博淵泉之量不遺

垢汚先賜榮示奉讀流涕以懼以悲屏營舞蹈不敢寧

處

屏步丁切屏營恐懼貌

是將收孟明於三敗

左傳秦孟明伐鄭晉敗孟明于般及

三年孟明伐晉晉敗于彭衙次年

責曹沫於一舉

沫莫

孟明伐晉濟河焚舟晉師不出

佩二切史記曹沫為魯將與齊戰三敗北莊公十三年

與齊桓公盟于柯沫執匕首劫桓公公乃許盡歸魯之

侵地俾折脅臄脚之倫

臄音北刑名前漢鄒陽上書司馬喜臄脚於宋平相中山范雎拉脅

折齒於魏卒為應侯

得自拂飾以期效命於鞭策之下此誠大君

子并容廣覽棄瑕錄用之道也自顧孱鈍無以克堪祇

受大賜豈任負戴精誠之至炯然如日拜伏無路不勝  
惶惕輕冒威重戰汗交深

謝襄陽李夷簡尚書撫問啟

某啟襄州員外司馬李幼清傳示尚書委曲特賜記憶  
過蒙存問捧讀喜懼浪然涕流

浪音郎

慶幸之深出自望

外伏惟尚書鶚立朝端風行天下入統邦憲出分主憂  
控此上游式是南服凡海內奔走之士思欲修容於轅

門之外躡履於油幢之前

幢傳江切

譬之涉蓬瀛登崑閬

閬音

浪海中三神山曰蓬萊方丈瀛洲又崑崙山有三角一角正北名閼風巔一角正西北名玄圃堂一角正東名

崑崙

宮 不可得而進也某負罪淪伏聲銷跡滅固世俗之

所棄親友之所遺敢希大賢曲見存念是以展轉歎歎  
畫詠宵興願為廝役以報恩遇瞻仰霄漢邈焉無由網  
羅未解縱羽翼而何施囊檻方堅雖虎豹其焉往不任  
踊躍懇懇之至謹奉啟起居輕黷威嚴倍增戰越

賀趙江陵宗儒辟符載啟

某啟伏聞以武都符載為記室天下立志之士雖然相



顧繼以歎息知為善者得其歸嚮流言者有所問執直

道之所行義風之所揚堂堂焉實在荆山之南矣幸甚

幸甚夫以符君之藝術志氣為時聞人才位未會盤桓

固久中間因緣陷在危邦與時偃仰不廢其道

符載為韋皋支

使時為劉闢真贊云行義則固輔仁則通他年良覲麟  
閣之中及闢敗載素服請罪高崇文以其贊有行義輔  
仁之語禮而為見忌嫉者橫致屑吻房給事以高節特  
而釋之

立明之於朝王吏部以清議自任辨之於外然猶小人

浮議困在交戰

前漢劉向傳註  
交戰謂守衛者

凡諸侯之欲得符君者

城聯壤接而惑於騰沸環視相讓莫敢先舉及受署之  
日則皆開口垂臂張望悼悔譬之求珠於海而徑寸先  
得則衆皆快然罷去知奇寶之有所歸也嗚呼巧言難  
明下流多謗一本作  
訕字自非大君子出世之氣則何望焉  
瞻望清風若在天外無任感激欣躍之至輕瀆陳賀不  
勝戰越不宣

與邕州李域中丞論陸卓啟

某啟伏以至公之道施恩而不求報獎善而不為功所

以振宣幽光激勵頽俗誠大君子所蓄積也竊見故招  
討判官試右衛胄曹叅軍陸卓生稟清操長於吏理累  
仕所至必有休聲

至一本作隸  
有一本作獲

再舉府曹績用茂著頃

以狂賊李元慶劫取留後擅樹兇徒構災扇禍期在旦  
夕一夫見刃莫為已用而卓以此時特立不懼終翦強  
暴以寧師人既而不幸嬰疾物故不獲一日趨事以受  
其職有功未報有善未錄伏承閣下言論之餘每所嗟  
異優給家屬恩禮特殊行道之人皆所欽伏儻錄其事

跡奏一贈官使懷憤之魂知感恩於地下秉志之士思受命於門庭足以勸獎三軍豈止光榮一族伏惟不棄狂瞽特賜裁量幸甚幸甚某與卓未嘗相識敢率愚直以期至公輕黷威嚴伏增戰悚謹啟

謝李中丞啟安撫崔簡

一本作謝李中丞  
安撫崔簡威屬啟

某啟伏見四月六日敕刺史崔簡以前任贓罪決一百長流驪州伏奉去月二十三日牒崔簡家口牒州安存并借官宅什器差人與驅使伏惟中丞以直清去敗政

以惻隱撫窮人罪跡暴著則按之以至公家屬流離則施之以大惠各由其道咸適于中威懷並行仁義齊立

繩愆糾繆列郡肅澄清之風匡困資無闔境知噢咻之

德

潘云噢乞六切又夾遇切咻音休又許主切左氏作煥休注慰念之聲

凡在巡屬慶懼

交深伏見崔簡兒女十人皆柳氏之出簡之所犯首末

知之盜以風毒所加漸成狂易

音亦

不知畏法坐自抵刑

名為賊賄卒無儲蓄得罪之日百口瞀然叫號羸頓不知所赴僅非至仁厚德深加憫恤則流散轉死期在須

欽定四庫全書

柳河東集注  
卷三十五

六

史某幸被縲囚久沐恩造至於骨肉又荷哀矜循念始終感懼無地謹勒祇承人沈澹奉啟陳謝下情輕瀆

上湖南李中丞啟

一本啟字上有干廩食字

某啟某嘗讀列子書有言於鄭子陽者曰列禦寇蓋有道之士也居君之地而窮若不好士使之然乎子陽於是以前君命輸粟於列子列子不受

出列子說符篇

固常高其志

又嘗讀孟子書言諸侯之於士曰使之窮於吾地則周之周之亦可受也又怪孟子以希聖之才命代而出不

卓然自異以潔白其德取食於諸侯不以為非斷而言  
之則列子獨任之士唯已一毛之為愛故遁以自免孟  
子兼濟之士唯利萬物之為謀故當而不辭今宗元處  
則無列子之道出則無孟子之謀窮則去讓而自求至  
則捧受而無慙斯固為貪凌苟冒人矣董生曰明明求  
財利唯恐困乏者庶人之事也

董仲舒  
策云

是皆詬耻之大

者而無所避之何也以為士則黜辱為農則斥遠無伎  
不可以為工無貨不可以為商抱大罪處窮微

音叶

以當

欽定四庫全書

桂江集卷三十五

七

惡歲而無廩食又不自列於閣下則非所以待君子之意也伏惟覽子陽孟子之說以垂德惠無使惶惶然控于他邦重為董生所笑則縲囚之幸大矣

上桂州李中丞薦盧遵啟

凡士之當顯寵貴劇則其受賜於人也無德心焉何也彼將曰吾勢能得之是其所出者大而其報也必細居窮厄困辱則感槩捧戴萬萬有加焉是其所出者小而其報也必巨審矣故凡明智之君子務其巨以遺其細



則功業光乎當時聲名流乎無窮其所以激之於中者  
異也若宗元者可謂窮厄困辱者矣世皆背去顧顧曠  
野獨賴大君子以明智垂仁問訊如平生光耀囚錮若  
被文繡嗚呼世之知止足者鮮矣既受厚遇則又有不  
已之求以黷閭下之嚴威然而亦欲出其感繫捧戴而  
效其巨者伏惟閣下留意裁擇幸甚幸甚伏以外族積  
德儒厚以為家風周齊之間兄弟三人咸為帝者師

解見

前送盧  
遵序

孝仁之譽高於他門伯舅叔仲咸以孝德通于

鬼神為文士所紀述相國彭城公嘗號于天下名其孝  
以求其類則其後咸宜碩大光寵以充神明之心今乃  
彫喪淪落莫有達者豈與善之道無可取耶

老子云天道無親常

與善人

獨內弟盧遵其行類諸父靜專溫雅好禮而信飾

以文墨達于政事今所以聞於閣下者無忤於心無愧  
於色焉以宗元棄逐枯槁故不求遠仕務顯名而又難  
乎其進也竊高閣下之舉賢容衆故願委心焉則施澤  
於遵過於厚賜小人也遠矣以今日之形勢而不廢其

言使遵也有籍名於天官獲祿食以奉養用成其志一  
舉而有知恩之士二焉可不謂務其巨者乎伏惟試詳  
擇焉言而無實罪其敢逃  
一本罪字下有也字  
逃字下有大譴字進退恐  
懼不知所裁不宣謹啟

柳河東集注卷三十五

欽定四庫全書

柳河東集注卷三十六

宋 童宗說 張敦頤 潘緯 音釋

啟

上權德輿補闕溫卷啟

時年十八一本啟字上有決進退字

補闕執事宗元聞之重遠輕適賤視貴聽所由古矣切以宗元幼不知耻少又躁進拜揖長者自于幼年是以

遽俊造之末跡

道初效切

廁牒計之下列賈藝求售

賈音古

闕

無善價

閱苦必苦  
覓二切

載文筆而都儒林者匪親乃舊率皆

攜撫相示談笑見昵喔咻逡巡為達者嗤

喔一角切  
於析切逡七

倫切嗤

無乃覩其樸者鄙其成狎其幼者薄其長耶將

音黃

行不拔異操不砥礪學不該廣文不炳耀實可鄙而薄

耶今鴛鴦充朝而獨干執事者特以顧下念舊收接儒

素異乎他人耳敢問厥由庶幾告之俾識去就幸甚幸

甚今將慷慨激昂奮攘布衣縱談作者之筵曳裾名卿

之門抵掌裁弁厚自潤澤進越無慙汙達者之視聽狂

捐愚妄固不可為也復欲俛默惕息疊足跼翼拜祈公  
侯之閣跪邀賢達之車竦魂慄股兢恪危懼榮者倦之  
彌忿厥心又不可為也若慎守其常確執厥中固其所  
矣則又色平氣柔言訥性魯無特達之節無推擇之行  
瑣瑣碌碌一孺子耳孰謂其可進孰謂其可退抑又聞  
之不鼓踴無以起泥塗不曲促無以由險艱不守常無  
以處明分不執中無以趨夷軌今則鼓踴乎曲促乎守  
其常而執厥中乎浩不知其宜矣進退無倚宵不遑寐

乃訪于故人而咨度之其人曰補闕權君著名踰紀行

為人高言為人信力學掇文

掇以冉切

時儕稱雄

時一本作朋

子

亟拜之足以發揚對曰裛燕石而履玄圃

宋人得燕石以為寶周客

觀之笑曰此燕石也與瓦甃不殊又崑崙山有玄圃晉書云若玄圃之積玉

帶魚目而游漲

海

文選盧諶詩序夜光投於魚目注夜光寶珠也魚目亂真珠也

祇取誚耳曷予補乎

其人曰跡之勤者情必生焉心之恭者禮必報焉況子

之文不甚鄙薄者乎苟或勤以奉之恭以下之則必勗

勵爾行煇燿爾能言為建瓴

建音營瓴音零出前高祖紀

晨發夕被



聲馳而響溢風振而草靡可使尺澤之鯢

研莫切

奮鱗而

縱海密網之鳥舉羽而翔霄子之一名何足就矣庶為終身之遇乎曷不舉馳聲之資挈成名之基授之權君然後退行守常執中之道斯可也愚不敏以為信然是以有前日之拜又以為色取象恭大賢所飲朝造夕謁大賢所倦性頗疎野竊又不能是以有今茲之問仰惟覽其鄙心而去就之潔誠齋慮不勝至願謹再拜

上大理崔大卿應制舉啟

一本啟字上不敏字

古之知己者不待來求而後施德舉能而已其受德者不待成身而後拜賜感知而已故不叩而響不介而合則其舉必至而其感亦甚斯道遁去遼闊千祀何為乎今之世哉若宗元者智不能經大務斷大事非有恢傑之才學不能探奧義窮章句為腐爛之儒雖或真力於文學勤勤懇懇于歲時然而未能極聖人之規矩恢作者之聞見勞費翰墨徒爾拖逢掖曳大帶游於朋黨且有愧色豈有能乎哉閣下何見待之厚也始者自謂抱

無用之文戴不肖之容雖振身泥塵仰睇雲霄何由而  
能哉遂用收視內顧頻首絕望

類與  
俯同

甘以沒沒也今者

果不自意他日瑣瑣之著述幸得流於衽席接在視聽  
閣下乃謂可以蹈遠大之途及制作之門決然而不疑  
介然而獨德是何收採之特達而顧念之勤備乎且閣  
下知其為人何如哉其貌之美陋質之細大心之賢不  
肖閣下固未知也而一遇文字志在濟拔斯蓋古之知  
已者已故曰古之知已者不待來求而後施德者也然

則亟來而求者誠下科也宗元向以應博學宏詞之舉  
會閣下辱臨考第司其升降當此之時意謂運合事并  
適丁厥時其私心日以自負也無何閣下以鯢鱗之勢  
不容尺澤悠爾而自放廓然而高邁其不我知者遂排  
逐而委之委之誠當也使古之知已猶在豈若是求多  
乎哉夫仕進之路昔者竊聞于師矣太上有專達之能  
乘時得君不由乎表著之列而取將相行其政焉其次  
有文行之美積能累勞不由乎舉甲乙歷科第登乎表

著之列顯其名焉又其次則曰吾未嘗舉甲乙也未嘗  
歷科第也彼朝廷之位吾何修而可以登之乎必求舉  
是科也然後得而登之其下不能知其利又不能務其  
往則曰舉天下而好之吾何為獨不然由是觀之有愛  
錐刀者以舉是科為悅者也有爭尋常者以登乎朝廷  
為悅者也有慕權貴之位者以將相為悅者也有樂行  
其政者以理天下為悅者也然則舉甲乙歷科第固為  
末而已矣得之不加榮喪之不加憂苟成其名於遠大

欽定四庫全書

新刊  
卷三十六

者何補焉然而至於感知之道則細大一矣成敗亦一矣故曰其受德者不待成身而後拜賜然則幸成其身者固末節也蓋不知來求之下者不足以收特達之士而不知成身之末者不足以承賢達之遇審矣伏以閣下德足以儀世才足以輔聖文足以當宗師之位學足以冠儒術之首誠為賢達之表也顧視下輩豈容易而收哉而宗元樸野昧劣進不知退不可以言乎德不能植志於義而必以文字求達不可以言乎才秉翰執簡

敗北而歸不可以言乎文登場應對刺繆經旨

刺力葛切乖也

不可以言乎學固非特達之器也付省陋質豈容易而

承之哉叨冒大遇穢累高鑒喜懼交爭不克寧居竊感

荀縈如實出已之德

縈音覽左傳成公三年荀縈之在楚也鄭賈人有將其緒中以出既

謀之未行而楚人歸之賈人如晉荀縈善視之如實出已

敢希豫讓國士遇我之報

史記云

伏候門屏敢俟招納謹奉啟以代投刺之禮伏惟

以知己之道終撫薦焉不宣宗元謹啟

上裴晉公度獻唐雅詩啟

宗元啟伏以周漢二宣中興之業歌於大雅載在史官

然而申甫作輔方召專淮夷之功

申伯甫侯方叔召虎

魏邴謀謨

辛趙致罕羌之績

魏相邴吉辛武賢趙充國潘云罕許畧切字當作罕井口堅切羌之別種

文武所注中外莫同伏惟相公天授皇家聖賢克合謀

叶德一以致太平入有申甫魏邴之勤出兼方召辛趙

之事東取淮右

平吳元濟也

北服恒陽

恒陽恒州也謂成德節度使王承宗獻德

隸二州遠子入侍

略不代出功無與讓故天下文士皆願秉筆

牘勤思慮以贊述洪烈闡揚大勲宗元雖敗辱斥迹守



在蠻裔猶欲振發枯槁決疏潢汙罄效黃郤少佐豪髮  
謹撰平淮夷雅二篇恐懼不敢進獻私願徹聲聞于下  
執事庶宥罪戾以明其心出位僭言惶戰交積無任踊  
躍屏營之至不宣宗元謹啟

上襄陽李僕射慙獻唐雅詩啟

宗元啟昔周宣中興得賢臣召虎師出江漢以平淮夷  
故其詩曰江漢之潁王命召虎

許音虎名  
與郃同

其卒章曰予

周受命自召祖命以明虎者召公之孫克承其先也今

天子中興而得閭下亦出江漢以平淮夷克承予先西

平王

李晟封西平王愬之父也

其事正類然而未有嗣大雅之說以

布天下以施後代豈聖唐之文雅獨後於周室哉宗元

身雖陷敗而其論著往往不為世屈意者殆不可自薄

自匿以墜斯時苟有輔萬分之一雖死無憾謹撰平淮

夷雅二篇齋沐上獻誠醜言淫聲不足以當金石庶繼

代洪烈裨官里人得採而歌之

裨蒲憐切前漢志小說家者流蓋出於裨官注

細米為稗街談巷說其細碎之言也王者欲知閭巷風俗故立裨官使稱說之又國語云為里人所命次注里

宰  
也 不勝憤踊之至輕瀆威重戰越交深謹啟

上揚州李吉甫相公獻所著文啟

宗元啟始閣下為尚書郎薦寵下輩士之顯於門閭者  
以十數而某尚幼不得與於廝役及閣下遭讒妬在外  
十餘年又不得效薄伎於前以希一字之褒貶公道之  
行也閣下乃始為贊書訓辭擅文雅於朝以宗天下  
元年李吉甫為考功郎中知制誥  
十二月為中書舍人翰林學士  
而某又以此時去表  
著之位受放逐之罰薦仍囚錮視日請命進退違背思

欲一日伏在門下而不可得常恐抱斯志以沒卒無以  
知於門下冥冥長懷魂魄幽憤故敢及其能言貢書編  
文冒昧嚴威以畢其志伏惟觀覽焉幸甚幸甚閣下相  
天子致太平用之郊報則天神降地祇出用之經邦則  
百貨殖萬物成用之文教則經術興行用之武事則暴  
亂翦滅依倚而冒榮者盡去幽隱而懷道者畢出然後  
中分主憂以臨東諸侯而天下無患

元和三年九月李  
吉甫罷為淮南節

度

使盛德大業光明如此而又有周公接下之道斯宗元

所以廢錮濱死而猶欲致其志焉閣下倘以一言而揚  
舉之則畢命荒裔固不恨矣謹以雜文十首上獻縲囚  
而干丞相大罪也寧為有聞而死不為無聞而生去就  
乖野不勝大懼謹啟

謝李吉甫相公示手札啟

宗元啟六月二十九日衡州刺史呂溫道過永州辱示  
相公手札省錄狂瞽收撫羈縲沐以含弘之仁忘其進  
越之罪感深益懼喜極增悲五情交戰不知所措宗元

質性庸塞行能無取著書每成於廢疾進德且乏其馨

香常願操篲醫門

操蒼刀切篲旋芮以醉二切

掬溜蘭室良辰不與

夙志多違昨者踴躍殘魂奮揚蓄念激以死灰之氣陳

其敝帚之詞

詞本作辭同帚正酉切曹子建書云家有敝帚享之千金

致之煙霄分

絕流眄今則垂露在手清風入懷華袞濫褒於赭衣

赭音

者前漢注犯罪則衣赭衣

龍門俯收於瑄井

潘云瑄坎陷二音莊子獨不聞夫瑄井之蛙

藻鏡洞開而秋毫在照文津傍暢而寒谷生暉化幽鬱

之志若覲清明換兢危之心如承撫薦非常之幸豈獨

此生伏以淮海劇九天之遙瀟湘叅百越之俗傾心積

念長懸星漢之上流形委骨永淪魑魅之羣

魑抽知切  
魅莫覲切

韓文云居蠻夷之地與魑魅為羣

何以報恩唯當結草

左傳魏顆事

無任喜

懼感戀之至

上江陵趙相公寄所著文啟

趙宗儒

宗元啟宗元往者嘗侍坐於崔比部

崔鵬字元翰

聞其言曰

今之為文莫有居趙司勳右者

貞元年趙宗儒自翰林學士再遷司勳員外郎

自是恒欲飾其所論著薦之閣下病其未就將進且退

者殆十數焉幸以廢逐伏匿獲伸其業類於向者若有  
可觀然又以罪惡顯大甘死荒野不能出其固陋以求  
知於閤下則固昧昧徒生於世矣謹獻雜文十首倘還  
以數字定其是非使得存於世則雖生與蠻夷居魂與  
魑魅游所不辭也輕瀆威重伏增惶灼

一本作戰惶

上嚴東川寄劔門銘啟

嚴

宗元伏惟僕射以仁厚畜生人以勇義平國難而劔門  
用兵之事最為天下唱首取其險固為我要衝

元和元年  
元和元年



山南西道節度討劉闢拔劍州斬其王師得以由其門

判史文昭德因分守險阻潰其腹心而入仿佯布獲

仿旁方二音佯音羊獲胡故切布獲散也

遂無留滯是閣下

之勲力宜著於萬祀而不已也宗元負罪俟命晷刻觀

望道里深遠不得悉聞當時之威聲然而竊以累受顧

念踊躍盛德恐沒身炎瘴卒無以少報於閣下是以晝

夜恟恟

平上二音恐也

不克自寧今身雖敗棄庶幾其文猶或

傳於世又焉知非因閣下之功烈所以為不朽之一端

也敢默默而已乎謹撰劒門銘一首惶恐獻上誠無以

稱宏大之略亦足以發平生之心不勝慚懼戰越之至

上江陵嚴司空獻所著文啟

嚴綬

宗元啟伏念往歲司空由尚書郎出貳太原宗元獲於

天長

驛名也

專用候謁伏蒙叙以世舊許造門闌自後司

空累膺寵榮位極公輔宗元得罪朝列竄身湘南霄漢

益高泥塵永棄瞻仰遼絕陳露無由司空統臨舊荆控

制南服道路非遠德化所覃是敢奮起幽淪仰希光耀

伏惟憫憐孤賤特賜撫存則縲紲之辱有望蠲除鳴吠

之能猶希效用謹獻雜文七首伏惟以一字定其褒貶  
終身之幸無以加焉上瀆威嚴伏增戰越

上嶺南鄭相公所著文啟

鄭綱

宗元啟伏見與當州韋使君書猥賜存問驚汗悼懼交  
動於中循念竟日若無容措幸甚幸甚宗元素乏智能  
復闕周慎一自得罪八年于今兢愧弔影追咎既往自

以終身沈廢無跡自明不意相國垂愍特記名姓守突

與者忽仰睇於白日

潘云與於到切突一叫切爾雅西南隅謂之突郭璞

云與謂室中隱興之處禮  
曰婦室聚突突亦隱興

負泥塗者遂自濯於清源快

心暢目不知所喻伏以聖人之道與其進也不保其往  
故敢藻飾文字洗滌心神致之門下祇俟嚴命伏惟收  
撫獎勵以成其終謹獻雜文三十六首冒昧上瀆無任  
踊躍惶恐之至

上李中丞所著文啟

即湖南  
李中丞

宗元啟宗元無異能獨好為文章始用此以進終用此  
以退今者畏罪悔咎伏匿惴慄猶未能去之時時舉首

長吟哀歌舒泄幽鬱因取筆以書紉韋而編

紉女巾切

略成

數卷伏念閣下以文章昇大僚統方隅而宗元幸緣罪  
辜得與編人齒於部內不以此時露其所為以希大君  
子顧視則為陋劣而自棄也敢飾近文及在京師官命  
所草者凡三卷合四十三卷不敢繁故也倘或以為有  
可采者當繕錄其餘以增几席之污去就鄙野伏用兢  
惶謹啟

上裴行立中丞撰訾家洲記啟

訾即移切  
又音紫

右伏奉處分令撰管家洲亭記伏以境之殊尤者必待  
才之絕妙以極其詞今是亭之勝甲於天下而猥顧鄙  
陋使為之記伏受嚴命不敢固讓退自揣度惕然汗流  
累奉游宴切觀物象涉旬摸擬不得萬一竊伏詳忖進  
退若墜久稽篆刻則有違慢之辜速課空薄又見疎蕪  
之累憊期廢事尤所戰慄憊與慄同謹修撰訖上獻退自跼  
躄音局不知所裁無任隕越惶恐之至

上河陽烏尚書重脣欲獻文啟

一本作上河陽烏尚書啟

宗元啟伏以尚書以碩德偉才代著勲烈兩河定亂三

城建功

烏重脣少為潞州牙將盧從史奉詔討王承宗陰與賊通元和五年重脣縛從史以獻憲宗嘉

重脣力擢帥河陽河陽有三城故曰河陽三城節度使

鼎彝竹帛未足云紀進臨

汝上

元和九年以重脣為汝州刺史充河陽淮汝節度使徙治汝州

控制東方隱然長

城朝野倚賴宗元雖屏棄遐壤而飽聞德聲所恨不獲

親執鞭弭以備戎伍

潘云弭音敎左氏其左執鞭弭注弭弓末無緣者

夙夜踊

躍不克寧居伏以威稜所加狂狡已震

謂吳元濟

莫大之績

重復增崇小子久以文字進身嘗好古人事業專當具

筆札拂縑紉

音鼎裏

贊揚大功垂之不朽瞻望霄漢戀慕

交深冒瀆威嚴伏增戰越

柳河東集注卷三十六



欽定四庫全書

柳河東集注卷三十七

宋 童宗說張敦頤潘緯 音釋

表

禮部為百官上尊號表

憲宗即位宗元尚為禮部員外郎豫  
作此表後元和三年憲宗方上尊號

臣某言伏以聖王之纂承天位也臣子必竭懇誠獻尊  
號安敢為佞禮在其中一則以告天地神祇二則以奉

宗廟社稷三則以安華夏蠻貊巍巍大稱其可廢乎臣等誠懼誠望頓首頓首伏惟皇帝陛下叶周文之孝德齊大禹之約身弘帝堯之法天過殷湯之解網未逾周月四海將致於時雍俯及元正率土更欣於再造然神人之願億兆之情有所不安率謂未盡善者以為帝德廣運而尊號猶闕郊廟備禮而祝嘏無辭嘏古雅切凡百兢懷華夷屬望臣謹按昔臯陶之頌舜伊尹之頌湯皆臣子至公面揚君父以敷于當代以播于無窮夫豈飾哉

率由事實帝王尊號蓋漸於此皇家光被四表祖宗列

文時當太和尊號表德耳目所接簡牘斯存稽之於前

典則如彼考之於聖朝又如此今龜筮習吉元正戒期

當品物惟新之時乃皇王大禮之日陛下郊天地饗宗

祧

他凋切  
遠祖廟

陰陽協和動植交暢不建至尊之稱

凡証切

恐

違列聖之心所以臣等冒死陳情請上徽號伏惟陛下

小謙讓之節安延企之情特詔名儒禮官百寮庶尹詳

明故實議崇聖德則人望允厭神心獲安山川效靈光

贊無疆之壽祝史陳言

一本作信字

永彰不朽之功臣等蒙

國寵榮備位班列無任懇望之至

第二表

臣某等言臣等再陳丹懇請獻鴻名天心未從隕越無措臣某誠惶誠恐頓首頓首謹按堯曰咨爾舜舜曰格

爾禹湯曰吾自甚武自號曰武王

出史記商紀

則堯舜禹湯

皆當時王者之號也考皇帝之故實徵往聖之憲章允協禮經煥乎圖牒伏惟皇帝陛下允恭克讓約已謙尊

參天兩地之功為而不有安上理人之德置而不論至  
心王言非羣下所仰望也然臣等伏以為尊號者所以  
類上帝饗祖宗萬人所稱百蠻所仰表聖德於率土播  
天聲於無疆臣下請之之謂禮帝王承之之謂孝孝大  
於讓禮先於謙百王不刊之典安可得而廢也臣等又  
以春秋本於五始元者一歲之首春者四時之首王者  
受命之首正月者政教之首郊天大禮者立極之首今  
天地交泰俯臨元辰正始之美正當其運陛下確達羣

願固守謙冲此臣等所以兢惕失圖惴惴無措上冒嚴  
憲敢逃厚責伏乞俯垂天聽察納微誠詔禮官議臣所  
請揆日推禮虔奉鴻休盡敬於此猶恐天光未照三獻  
無徵彷徨闕庭伏待斧鑕

職日切

無任聳望之至

禮部賀冊尊號表

元和十四年作宗元時為柳州  
刺史當題云柳州賀冊尊號表

臣某伏奉月日制陛下膺受尊號率土臣子慶抃無窮  
臣聞立極之大四海無以報神功配天之尊萬物不能

崇聖德唯有徽號是彰中興所以上探天心下極人欲

中謝

伏惟元和聖文神武法天應道皇帝陛下統承千載

光被六幽蠱賊盡除福應皆集有首有趾咸識太平勲

臣增爵祿之榮戎士加賞延之寵片善必錄微功盡昇

獨惟聖謨事絕酬答萬國缺望

童云缺古穴切又窺睡切

百工怨思

是以啟元和之盛典延昊穹之景祚理厯凝命實曰聖

文和衆定功時惟神武運行有法天之用變化乃應道

之方鬼神協謀夷夏同志大禮既建鴻恩遂行歡呼遠

市於九圍

市即  
運字

滲漉普周於八裔

滲所禁切又所錦切  
漉音鹿謂潤澤下究

慶超邃古美冠將來臣獲守蠻荒遠承大典潢汚比陋  
河清幸遂於千年塵壤均微山呼願同於萬歲無任慶

賀屏營之至

屏步  
丁切

為京兆府請復尊號表三首

德宗時宗元  
為藍田尉作

臣某言某月日諸縣耆老某等若干人詣臣陳狀辭意  
迫切以陛下尊號未復請詣闕上表者人心已鬱安可  
久違天意實勤諒難固拒撫狀感悅深契微誠臣某誠



懇誠迫頓首頓首伏惟皇帝陛下聖神之功貫於天地

文武之道超乎古今

德宗建中元年羣臣上尊號曰聖  
天神武皇帝興元元年詔中外書

秦不得言聖  
天神武之號

盛德愈大而謙光益深玄化已成而徽號

未復遂使神祇歆望人庶怨思沐浴鴻澤者敢懷晷刻

之安捧戴皇恩者不知寢食之適負愧懷憤萬方一心

日日以冀遂淹星歲況今地不愛寶致百穀之豐穰天

惟降衷呈衆瑞而繁委污萊瘠鹵之地混成大田

潘本  
萊作

來瘠秦亦切薄也  
鹵郎古切鹹瀉也

草木蟲獸之微化為神貺萬靈垂鑒

昭然甚明此而不從臣所大惑矧又兵戎永戢夷狄咸

懷昭然長春

昭一本作煦

樂以終日是以耆老等深感聖育

踴躍不寧上奉天恩跼蹐知懼

跼蹐音局脊

頓顙闕下願復

鴻名不謀而同無期而至此皆上玄幽贊以誘其衷列

聖垂靈以悟其意臣以為陛下當今于斯旨不可忽也

臣又伏以陛下賞功與能舉賢出滯小言不廢片善是

褒豈可使臣子之效雖微而必旌君父之德盡美而無

稱凡在覆載

一本此下更有執不驚惶四字

不勝慙倒恐懼之至

一本恐懼

陳作恐

謹封耆老等狀奉表昧死陳請以聞謹言

第二表

闕

第三表

臣某言臣伏以耆老等並發丹誠將貫白日請復徽號以光聖謬臣以其懇款自中不可禁止遂抗表陳請備述微誠伏奉墨詔批荅未蒙允許者衆心尚阻天意未從懇迫逾深兢惶無措臣某伏惟皇帝陛下道大益謙化成彌損雖江海善下每應朝宗之心

老子云江海所以能為百谷王

者以其善下

而日月居高久稱照臨之位況復上承天命下

覩人誠若然辭之理有不可伏以陛下功參造化政體

乾坤萬邦宅心百靈效職此聖之至也明並兩曜信如

四時先天不違窮神知化此神之極也道德純被禮樂

興行宸翰動於三光睿藻窮於六義此文之備也五兵

不試

周禮五兵注戈  
父戟酋矛夷矛

七德咸宣

左傳襄公十二年夫武  
禁暴戢兵保大定功安

民和衆豐則  
也武有七德

殊方者知歸負固者率服此武之成也黃

龍皓兔甘露慶雲神禾嘉瓜祥蓮瑞木萬物暢遂百穀

茂滋此天之至靈也黎老班白伏守闕庭鰥嫠幼童

陵

切之

謠歌道路此人之至誠也有其德而無其號拒乎天

而違乎人雖陛下謙讓之至美抑非臣心之所安也伏  
以賤志難明微誠莫達戴天彌懼履地益慚不任懇迫  
屏營之至伏願早建大號以稱天人之心謹再奉表昧  
死陳請以聞

為耆老等請復尊號表二首

一本無  
二首字

京兆府長安縣耆老臣某等言

一本作石靈等一本作  
石靈等潘云靈徒感切

臣伏以陛下尊號未復一十九年盛德彌光大化益被

光大一本  
作大玄字

加以休徵咸集福應具臻至於今歲紛綸尤

盛風雨必順生長以時五稼盡登萬方皆稔神意人事

正在於斯天不可違時不可棄臣等誠懇誠迫頓首頓

首臣聞恩深必報德盛必崇以陛下九重之尊推崇無

上以陛下四海之大報效何施唯有尊名用光聖理闕

然未復誰所敢安臣心則微天意甚重伏惟皇帝陛下

體昊穹以施化虔上帝以致誠今即千祥應期百神奉

職飛走之物皆已效靈草木之類咸能應聖天命降於

上人誠發於中此而可辭孰云有奉況復野多滯穗畝

有餘糧足食之慶充溢於京垣

垣與坻同直飢切水中可居曰坻詩曹孫之庚

如坻如京

阜財之謠歡呼於道路盡非人力皆是天成神祇

之望既勤遐邇之心又迫況臣等得生邦甸幸遇盛明

身體髮膚盡歸於聖育衣服飲食悉自於皇恩被玄化

而益深望鴻名而未覩懇倒之至夙夜不寧謹詣光順

門昧死請復聖神文武之號以副天地宗社之心使海

內赤子得安其所臣等不勝懇倒迫切之至

第二表

一本以此表補京兆府  
請復尊號第二表之闕

京兆府長安縣耆老臣石靈等言伏奉墨詔批臣所請  
復尊號未蒙允許者捧對惶遽不知所裁天實命之於  
臣何有臣等誠懇誠懼頓首頓首臣聞聖君以奉天為  
心不以執謙為德以順人為大不以崇讓為優今陛下  
深拒天人之誠猶懷謙讓之道臣等愚惑未知所歸且  
百祥荐臻特表昊穹之睠

旨倦切

五穀蕃熟用彰后土之



勤億兆嗷嗷籲天請命上下交應幽明同心舉而違之  
臣所未識況臣等共被仁育同臻太和陛下德達上玄  
以豐人之衣食道躋壽域以延臣之歲年沐浴皇風二  
十餘載兒童感化鰥寡知恩故臣等出鄉之時歡呼遍  
野閭里勉臣以不進不止妻孥誓臣以不遂不歸唯竭  
血誠退無面目便當殞首闕下終不徒還伏惟陛下照  
臣懇迫之情一本作誠字哀臣羸老之命臣等不勝嗚咽慙  
恨之至謹奉表陳謝以聞

禮部為文武百寮請聽政表三首

順宗時潘  
本作四首

臣某等言臣聞大道必體於至公大孝莫高於善繼上  
觀列聖旁考前王罔不俯就禮文仰承大事嚴奉宗廟  
慰安元元然後德教惟新邦家永固伏惟皇帝陛下寢  
苦泣血苦詩廉切草也  
居喪以為獲席號慕無時貫于神明動于天地  
未臨庶政猶徇至誠凡在人臣孰不哀懼伏惟先聖遺  
旨俾陛下抑哀而聽政本朝乏人使臣等竭忠以奉上  
非敢懼死輒布懇詞期於必從以慰寰宇且王業至重

軍國方殷一日萬幾不可暫闕伏願追尊顧命蹈履成規恢王者華夷之望順上帝乃眷之懷臣等不勝哀迫誠懇之至

第二表

晏元獻本據文苑英華此表乃是林達請聽政第三表

伏奉大行皇帝知陛下至性自天恐陛下執哀過毀上惟九廟之重下念萬務之殷故遺詔丁寧俾遵舊典今百辟卿士顙然在庭瞻望清光已七日矣固陳誠請猶未允從內外憂惶莫知所出臣聞大孝之本繼志為難

酌禮之情得中為貴是以哀迷期數哭泣有常俯而就

之聖人所重

禮記檀弓上子思曰先王之制禮也過之者俯而就之不至焉者跂而及之

知

難繼也君子不為

同上季子阜曰買道而葬後難繼也

伏願少抑哀懷仰

遵理命

理即治也

以副神祇之望以安億兆之心光祖業於

無窮流德化於天下凡在臣子孰不悲戴

又第二表

晏元獻本按文苑英華此乃宗元所作

臣某等言臣聞聖凡殊塗邦家異禮故王者捨已從物

用身許天雖居達喪

達即通也

猶以事奪伏以代行皇帝

謂德

宗道成鑄鼎仙等御龍

黃帝採首山銅鑄鼎荆山下鼎既成有龍垂胡髯下迎黃帝黃

帝上騎後宮从上龍者七十餘人因名其處曰禹湖

萬姓長號

平聲

九有顒望陛下

以聰明睿聖嗣守寶圖爰及宅憂迨茲累日而孝思罔

極尚輟乃雍之言

高宗諒陰三年不言言乃雍

庶政未釐頗闕如絲

之命臣等當覽載藉祖知喪紀若成周顧命歷代猶遵

西漢詔音前王所奉

詔音一本作遺詔謂漢文帝遺詔今天下以日易月

我國家

以孝理天下文明應期上用此法胥以傳授蓋事歸至當則不可不遵禮貴從宜則不得不守理固然也臣等

是以上陳愚懇輕瀆宸嚴冀遂血誠俯親國政而陛下  
執喪逾切聽理未聞億兆嗷嗷不知所訴臣以為天子  
之孝在於保安社稷司牧烝黎功超百王慶流萬代亦  
何必守臣下之小節蔑皇王之大猷固阻羣情務成謙  
德伏願以遺詔為念奪在疚之懷就臨軒之制天下幸  
甚

第三表

伏以萬機至重遺旨難違再獻表章上塵旒扆精誠徒

竭天意未迴內外遑遑人神企望臣聞王者之孝異於

匹夫禮不相訟

余專切

道資適變當承平之代故殷帝宅

憂而不言

商高宗

遇有事之時則周王未葬而誓衆

武王伐紂

況今戎車猶駕邊候多虞兩河之寇盜難除百姓之瘡

痍未合亂者思理危者求安天下嗷嗷正在今日誠宜

抑其至性以副羣心成先帝之大功繼中興之盛業豈

可寢苫啜泣

苦詩廉切  
啜殊悅切

庶政闕然九廟之靈何報萬方

之望何塞臣等職參樞近誠切邦家若陛下未忍臨軒

尚持前志臣等有死而已不敢奉詔不勝哀迫懇切之至

賀踐阼表

順宗即位宗元代節鎮作此

臣某言太子中舍嚴公弼至

公弼乃山南西道節度嚴震之子

奉某月

日勅書慰諭伏承陛下以某月日虔奉典冊允昇寶位

凡在羣生孰不慶幸臣某誠懼誠忤頓首頓首臣聞天

地泰而聖人出雷雨解而品物榮

解下隘切

是以五行迭用

水火更其位十葉重光宗廟輔其德殷宗恭默再開成



湯之業漢文聰明克承高祖之緒陛下重離出曜體乾

繼統主鬯彰孝恭之美撫軍著神武之功欽承遺訓

承一

本作奉字

永保鴻業過密之中施雨露以被物遐邇之地覩

日月之繼明則四維之外八極之表人神胥悅草木皆

春煦嫗生成不失覆載

潘云煦吁句切嫗於遇切天以氣煦地以形嫗

沉臣謬

膺藩守累受國恩爰自出身洎乎領鎮沐浴聖澤優游

昌時不獲覩闕庭之禮展臣庶之分戴天賀聖倍萬恒

情

禮部賀改永貞元年表

宗元為禮部郎中賀憲宗

臣某等言伏奉今日誥今月九日冊皇帝改貞元二十一年為永貞元年自貞元二十一年八月五日昧爽以前應犯死罪特降從流流已下遞降一等者實命方始聖厯用彰載宣臨照之明遂施渙汗之澤臣某等誠慶誠賀頓首頓首伏以重光下濟積慶旁行漢祖推奉教

之尊

前漢高祖紀詔曰子有天下尊歸於父朕被堅執銳平暴亂立諸侯皆太公教誨也今尊太公曰太

上

文王遂無憂之志

中庸無憂者其唯文王乎以王季為父以武王為子

正名紀

歷

名一本  
作明

表運行於萬方宥過輕刑流汪濊於四海

於濊

廢鳥外二切汪濊  
深廣也又言饒多

歡呼抃蹈遐邇攸同臣某等親奉聖

謨仰承大化踊躍之至倍萬恒情無任蹈舞欣慶之至

禮部太上皇誥宜令皇帝即位賀表

順宗傳  
位憲宗

臣某等言伏奉今日太上皇制命陛下即皇帝位光奉

寶圖丕承鴻業溥天率土慶躍難勝臣某等誠喜誠抃

頓首頓首臣聞皇建其極存諸大訓帝出于震著在易

經繼明以照于四方重熙以臨於萬國動植品彙永賴

昭蘇山川鬼神咸用欣戴臣某等獲備班列親仰聖明  
踊躍之誠倍萬恒品無任抃躍喜慶之至

禮部賀立皇太子表

廣陵王  
即憲宗

臣某等言伏奉今月二十四日制廣陵郡王宜冊為皇  
太子改名某仍令所司擇日備禮冊命者天序有奉皇  
圖載寧臣某等誠慶誠賀頓首頓首臣聞商書載以貞  
之文漢史傳早建之議前漢文  
帝紀不惟立愛其在繼明一本

其作陛下奉率前規敷揚盛典顧茲守器之重爰正承  
期字

華之位尊義方之教載錫嘉名崇建樹之禮式光典命  
以長而立自符於慎擇必子之選遂合于至公邦本不  
搖王業彌固此皆宗社垂祉啟佑皇心乾坤合謀保安  
聖運足以播休氣於四海洽太和於萬靈食毛含齒所  
同歡慶臣等奉承制命蹈舞周行踴躍之誠倍百恒品  
無任慶抃感悅之至

禮部賀皇太子冊禮畢德音表

貞元二  
十一年

臣某等言伏奉今日制皇太子冊禮云畢思與萬方同

其惠澤者盛典斯舉鴻恩遂行凡在率土不勝抃躍臣  
某等誠喜誠賀頓首頓首伏惟皇帝陛下克奉神休以  
正邦統建天下之本宗廟以安致萬國之貞兆人攸賴  
典冊既備慶澤載流既廣愛而推恩亦好生而布德緩  
刑而囹圄知感進勲而嗣續增榮崇教諭之方忠良是  
舉嚴贊襄之禮賜與有加一本  
作相字旌孝弟以厚於人倫  
敬鬼神而修其祀事況行禮之日則屏翳收蹟太陽宣  
精用彰出震之休更表重離之曜神化旁暢皇風遠揚

自華及夷異俗同慶臣某等謬參著定倍百恒情無任  
惟慶踴躍之至

為王京兆皇帝即位禮畢賀表

代王權  
賀憲宗

臣某等言臣聞大人繼明百神所以受職天子有道萬  
國由是承風伏以皇帝陛下纘聖垂休順時御極負宸  
而會朝夷夏

宸隱  
豈切

踐阼而統和天人幽明感通遐邇昭

泰遂使祥光下燭嘉氣旁通周王謝流火之符魯史愧  
書雲之典食毛含齒惟朴無窮臣某等幸覩昌時獲奉

大慶踊躍之至倍萬恒情無任蹈舞欣躍之至

代韋中丞賀元和大赦表

代永州刺史

臣某言伏奉正月二日制大赦天下永貞二年宜改元和元年太陽既昇煦育資始霈澤斯降膏潤無遺臣某誠慶誠賀頓首頓首伏惟皇帝陛下仁化旁流孝理弘闡紀元示布和之令肆眚見恤人之心曠然滌瑕得以遷善渙發大號申明舊章農有薄征市無彊價勲勤是錄爵秩以班寵寧間於幽明澤必周於夷夏近甸輕權



酤之入遠人忘水旱之災既行慶於官寮亦推恩於天  
屬諸生喜黌塾之廣庶老加絮帛之優量入所以備凶

興廉期於變俗爰褒有客尊賢之典維新

詩周頌有客謂二王之後

為客載奉素王宗予之道斯在

記檀弓孔子曰天下孰能宗予

綸言一降

庶政畢行懷生之倫感悅無量臣某等守在遐邇親奉  
詔條踴躍之誠倍百恒品無任感恩抃舞屏營之至

禮部賀冊太上皇后賀表

憲宗即位太上皇誥旨冊之

臣某等言伏奉今月日誥良娣王氏冊太上皇后

潘云

弟太子有良媛董氏冊太上皇德妃媛干切宜令所司備

禮冊命者母儀有光坤道克順陰教方行於萬國內理

克和於六宮臣某等誠慶誠賀頓首頓首伏惟皇帝陞

下對若天休奉揚睿旨長秋既登其正位長秋皇后所居此謂王后

瑜狄亦被於恩光瑜音搖刻雉飾服也禮記夫人瑜狄此謂皇德妃奉養見三

朝之安禮記文王朝王季日三周旋有四星之輔史記天官書後宮四星末大星

正妃餘三星後宮宣獨配乾稱大助日為明所以表王化之源

知孝悌之本冠映千古儀刑四方臣某等捧戴施行踊

躍無地無任蹈舞欣喜之至

禮部賀太上皇后冊畢賀表

永貞元年

臣某等言今日太上皇后冊禮云畢率土臣妾慶抃  
無窮臣某等誠慶誠賀頓首頓首伏以太上皇后著虞  
嬪之至德嗣周母之徽音表率六宮明彰萬國陛下克  
修理本以暢化源神道知事地之方人倫識尊親之大  
豈惟婦順斯備陰禮用修其以播正始於王風  
王一本作國  
致時雍於帝典臣某等謬塵榮位獲覩盛儀踊躍之誠

倍百恒品

百一本  
作萬

賀皇太子牋

代藩鎮賀廣  
陵王為太子

某言伏奉月日制書殿下祇膺茂典位副青宮

青宮東  
宮也神

異經曰東方有宮青石為牆高三仞門有  
銀榜以青石碧鏤題曰天地長男之宮

溫文光三善

之名

禮記文王世子篇行一物而三善皆  
得者唯世子而已又云恭敬而溫文

繼照協重離

之慶萬葉固本羣方宅心含生之徒孰不欣戴況某夙  
蒙期獎職在藩方惟抃之誠倍萬恒品

御史臺賀嘉禾表

貞元中劉  
濟所進

臣某言今月日宰臣以幽州所進嘉禾圖各一軸示百

寮者伏以嘉穀順成靈貺昭格天人合應遐邇同風臣

某誠惟誠慶頓首頓首伏惟皇帝陛下睿謀廣運神化

旁行植物知仁祥圖應聖靈嶽不愆於贊祐燕谷用遂

於生成

鄒衍泰  
谷事

豐稔既均知朔南之被澤休嘉克叶見

天地之同和六穗慙稱於漢臣

司馬相如封禪  
書嘉穀六穗

異畝耻

書於周典自中形外均慶同歡臣某謬職憲司獲覩休

瑞無任抃躍之至

禮部賀嘉禾及芝草表

貞元中韋臯  
崔宗所進

臣某等言伏見今月某日內出劔南所進嘉禾圖及陝  
州所進紫芝草示百寮者珍圖煥開瑞彩交映遐邇偕  
至福應攸同臣某等誠慶誠賀頓首頓首伏惟皇帝陛  
下緝熙至道保合太和天惟發祥地不愛寶嘉禾擢賢  
靈草抽英獻于王庭唐叔慙同穎之異尚書云薦諸郊廟

班史謝連葉之奇

前漢武帝紀甘泉宮  
生芝草九莖連葉

既呈蕤蕤之祥

潘云蕤魚紀切草  
貌又魚力切

更覩煌煌之秀豐年斯著聖壽用彰

飲和之人惟抃無極臣某等優游至化披玩殊姿慶抃  
之誠倍百恒品

京兆府賀嘉瓜白兔連理棠樹等表

貞元  
中

臣某言今日日中使王自寧出徐州刺史張愔

愔挹婁  
切張建

封之  
子

所進嘉瓜圖及白兔兒一并出陳許等州觀察使

上官說所進許州連理棠樹圖示百寮者惟天眷命是  
降百祥惟聖欽承用膺多福臣某誠慶誠賀頓首頓首  
臣伏以太和所蒸至德斯應圖物獻瑞周於遠方神瓜

合形式表綿綿之慶異崇連質用彰煜煜之榮

一本作休

況

金風發祥白兔來擾告有秋之嘉應著成歲於神功雜

運紛綸

運大合切雜運聚積之貌

如山斯委人盡登於壽域物咸暢

於薰風況臣特感深恩欣逢衆瑞踴躍之至倍萬恒情

禮部賀甘露表

貞元二十一年宗元遵禮部員外郎掌尚書儀表

臣某言中使王自寧至伏奉宣聖旨出延和殿前丁香樹甘露一大合示宰臣未時又出一大合令明日示百寮甘露見降未止者玄化升聞靈貺昭答必呈尤異之



應以告天地之和臣某誠歡誠慶頓首頓首伏惟皇帝

陛下均煦育之功敷滂澍之澤太和潛達閔瑞克彰發

於天霄特降宮樹朝光初燭方湛湛而不晞畏景轉炎

更灤灤而未已綴葉而珠璣積耀盈器而冰玉呈姿芳

襲椒蘭味兼飴醴

飴音怡  
錫也

然則零於庭而著異紀於年

以標奇

漢宣  
帝

徒矜往辰孰並茲日況樹有丁香之珍殿

即延和之號所以著芳風之遠播期聖壽於無疆事絕

古今慶傳遐邇臣謬承渥澤獲覩殊祥抃躍之誠倍萬

恒品

禮部賀白龍并青蓮花合懽蓮子黃瓜等表

一本

此下注云

京兆恐非

臣某言伏見今日內出滄州所進白龍見圖又出西  
內定禮池中青蓮花并神龍寺前合歡蓮子示百寮二  
十三日又出鹽州所進合歡黃瓜圖者二氣交泰萬國  
同和動植思協於殊祥遐邇畢陳其嘉應披圖按牒聖  
理彰明臣誠歡誠慶頓首頓首伏以天地非遠睿感必

通疊瑞重祥累集宮禁池蓮表異靈化非常敷彼清光  
徵佛書而尤絕成其嘉實驗祥經而甚稀積慶旁流自  
中徂外遂使龍騰白質乘秋果應於金行瓜合黃中表  
聖更彰於土德遠通邊徼近出苑囿合慶同歡周於億兆  
況復邦畿之內雨露必時宿麥大穰嘉穀滋茂和風孕  
育一本作秀字靈氣陶蒸是皆發自帝心達於天意周流升  
降成此歲功惠彼羣生自為嘉瑞臣某深惟多幸獲遇  
斯時觀靈眎之備臻知人和之溥洽無任慶抃躍蹈之

至

禮部賀白鵲表

臣某言伏奉進旨宣示前件白鵲者霜毛皎潔玉羽鮮明色實殊常性惟馴狎臣聞聖王之德無所不至有感則應無幽不通伏惟陛下恩霑動植仁洽飛翔故得茲

禽呈休效質伏以白者正色式表金方鵲以知來

淮南子云

式彰冠服用符歸化之兆克耀太平之階臣職參禁垣獲覩嘉瑞無任慶抃之至

禮部賀嘉瓜表

臣某等今日內出浙東觀察使賈全所進越州山陰縣  
移風鄉百姓王獻朝園內產嘉瓜二實同蒂圖示百寮  
者寶祚惟新嘉瑞來應式彰聖德更表天心臣某等誠  
慶誠賀頓首頓首伏惟皇帝陛下保合太和續熙庶類  
德馨上達神化旁行嘉瓜發祥來自侯服質惟同蒂見  
車書之永均地則移風知化育之方始雖七月而食幽  
土歌王業之難五色稱珍東陵詠佳賓之會

阮嗣宗詩  
昔聞東陵

瓜近在青門外五色耀朝日嘉賓四面會未聞感通若斯昭著者也臣某等

遭逢聖運親仰珍圖抃躍之誠倍百恒品無任慶悅之至

為王京兆賀嘉蓮表

王權

臣某言今日某時中使某奉宣聖旨出西內神龍寺前  
水渠內合歡蓮花圖一軸示百寮者祥圖煥開異彩交  
映贊天地之合德表神人以同歡臣某誠歡誠慶頓首  
頓首伏惟皇帝陛下道協重華慶傳種德陶陰陽之粹

美乎造化之精英吉慶每見於天心發祥必自於禁掖

是使雙華擢秀連蒂垂芳香激大王之風影耀天泉之

水

沈約宋書文帝永嘉二十二年天泉池二蓮同幹

煥開宮沼旁映給園

謂給孤獨

圓指言神龍寺也

靈貺應期天龍護聖寶曆超於小劫神功

允洽於大千臣某獲覩昇平濫居榮寵聞瑞應而稱慶  
仰績事而增歡無任抃蹈喜躍之至

為王京兆賀雨表

一本表下有一字

臣某言臣昨日面奉進旨以近日少雨今月內無雨即

須祈禱今日便降甘雨者天且不違神必有據密雲與  
綸言繼發時雨將天澤並流臣某誠歡誠慶頓首頓首  
伏惟皇帝陛下憂切蒸黎慮深稼穡思彼未兆防於無  
形滲漉每出於湛恩變化必隨於廣運宸衷暫惕已矯  
御天之龍聖謨既宣遂洽漏泉之澤霑霽周布霑徒感切霽徒  
對切霽霽雲貌霏微四施黍稷盡成公私皆及野夫鼓舞知帝  
力之玄通官吏歡呼見天心之默喻臣某牧人京邑動  
仰皇靈渥澤徒加涓滴無助無任感悅屏營之至



王京兆賀雨表二

臣某言臣伏見今月二十四日時雨溥降伏以聖心積  
念天意遽迴移造化之玄功革陰陽之常數臣某誠慶  
誠抃頓首頓首皇帝陛下仁育蒼生恩同赤子自頃天  
雨未降時稼或愆貶食齋戒至誠幽達又慮宿麥無備  
播種失時出於宸衷特令賑貸時一本作將字睿謨潛運甘雨  
遂周布濩垂陰隨聖澤而俱遠滂沱積潤與恩波而共  
深臣某才術無聞謬司邦甸生成必資於帝力進退何

欽定四庫全書

卷三十七

補於天工沐浴太和慙荷無極無任慶躍屏營之至

王京兆賀雨表三

臣某言今月十三日面奉進旨緣自春來少雨宜即差官精誠祈禱者十四日臣便差官分赴靈跡其日陰雲

四合至十五日甘雨遂降伏惟皇帝陛下言為神化動

合天心未成早暵之虞已積幽勤之慮衆靈受職蒼蔚

且躋於南山

蒼鳥外切

百穀仰榮滂霈遂霑於東作

仰去聲左傳百

穀之仰膏雨

睿謨朝降膏澤夕周知天人之已交識陰陽之

不測然則周王徒勤於方社殷帝虛美於桑林豈若無  
災而早圖未禱而先應化超前聖道貫重玄徧野同歡  
傾都相慶臣之欣躍倍萬恒情

王京兆賀雨表四

臣某言臣於三月二十九日奉進旨於諸靈跡處祈雨  
至三十日甘雨遂降者臣聞惟聖有作先天不違發令  
而祥風已興致誠而玄液旋被臣某誠欣誠賀頓首頓  
首伏惟皇帝陛下側身防患道邁周王盡力勤人功超

夏后聖謨廣運驅百靈以從風神化旁行滋五稼而流

澤油雲四合膏雨溥周農壤遂一於肥磽

丘交切  
與境同

滲漉

盡霑於遐邇蒸黎詠德知必自於聖心草木欣榮如有  
感於皇化有年之慶實在於斯臣以無能謬領京邑上  
勞宸慮運此歲功無任喜懼屏營之至

賀親自祈雨有應表

想是為外  
州刺史作

臣某言臣得上都院官金部員外郎韓述狀報以時雨  
未降親自於龍堂祈禱有靈禽羣翔自成行列如隨威

鳳以翼龍舟其日降雨者

中謝

伏以時或憊陽歲之常候

式當聖日無害豐年陛下敦本務農憂人閔雨宸慮所

至天心自通故得瑞鳥迎舟掩商羊之舞

家語齊有一足之鳥舒翼

而跳孔子曰天將大雨商羊鼓舞

仙雲覆水協從龍之徵初泛洒於上

宮遂滂霈於率土自中徂外皆荷生成雨公及私靡不

碩茂殷后徒勤於自剪

左氏春秋湯克夏不雨乃以身禱於桑林剪其髮割其爪以為

犧

周公空幄於舞雩

周禮春官女巫巫歲旱則舞雩

臣以庸虛謬司垣

翰有年之慶惟聖之功臣某不任喜慶屏營之至

柳河東集注卷三十七